

**d'Veesperkirch hot g'schmeckt**

**I ko ond werd' mers net verkneifa,  
des muass raus und zwar sofort,  
will euch verzähla was passiert isch,  
vor knapp Wocha en oserm Ort.**

**Do hot ebber a Idee g'het  
diea hot der no au umgesetzt.  
Des war net bloß noch meiner Moinung,  
zu äller Vorteil no zu letzt.**

**Diea Vesperkirch, dui isch vorüber,  
se wurd' begeistert agenomma  
man sah's täglich an de Leut' au,  
...es send emmer viele komma.**

**Mei Frau ond i hent's ausprobiert  
ond gingat no zu zweut  
i sag's euch ehrlich, des hot sich g'lohnt,  
mir hent's ganz g'wies net bereut.**

**Des Essa des war meh als günstig,  
des soll ma net verhehla  
für da Geldbeutel isch's a Wohltat g'wea  
ond net bloß für d'Schwobaseela.**

**Der wichtigste Aspekt für d'Leut'  
war des mitanander schwätza,  
denn zur Vesperkirch nemmt ma sich Zeit  
do braucht ma au net hetza.**

s'Beta kam no au an d'Reuh  
des hot ma g'wieß net übertrieba,  
a Vateronser ond a Lied,  
...dobei isch's meistens blieba.

Ma muass äll diea viele Helfer loba  
am Buffet ond em Service  
se warat älle bodaguat  
ond a großes DANKE isch na g'wieß.

En oigna Mundschenk hosch schier g'het  
d'Gläsla waret niemols leer.  
Derzua no Kaffe ond en Kuacha  
Herzle ...was begehrt du mehr.

Au will i selle net vergessa,  
diea hinter de Kulissa g'werkelt hent  
drum au euch a herzlich's Danke  
weil ihr so fleissig bei der Sach g'wea send.

Der alte Schultes und der jetzig,  
die hent sich boide sehr bemüht  
do sieht ma, was sich macha lässt,  
wenn ma zamma an oim Strickle zieht.

Am End' ja do bedank i mi  
beim Kopf von dem Spizateam  
ond des war Kriegers Bernd,  
d'Veesperkirch', ...war a Idee von ihm.

Drum mei Bitte hier zum Schluss  
ma ko für dui Veesperkirch' bloß werba,  
machat's wieder, au em nächsta Johr,  
...lasset dui Idee net sterba.